

Kloschterräbe-Schränzer

Fuuli Sprich

Motto: E jede Gängster, jede Protz
verdient mit fuule Sprich sy Glotz.
Die Poesiereglaamesänger
sinn alles grossi Schlangefänger.

Sei heiter -- und es gieng schynts besser
verzelle-n-aim die Consumresser
am Äscheplatz. De wirsch grad muff
und d'Galle stygt dr mächtig uff:

Es bruucht kai Hirni, bruucht kai Grütz,
mit Sprich ellai holsch hitte d'Stütz.

Beginn den Tag mit einem Ei,
noh besser isch's, de frissisch zwei.
Iss Honig mein Sohn, denn er ischt xund,
womeeglig täglich siebe Pfund.

Dr dimmschti Siech isch immer gstopft,
wenn er so Sprich in Masse glopft.

Am Steuer keine Alkoholier,
Trink Guggemilch, du fährst viel wöhler
Denn hitte fahrt doch jede Ma
als Kenner Alfa Gloria

Duesch Värslu brinze wie-n-e Stimper,
so bringts dr glych e Huuffe Glimper.

Wer rechnet, kauft im -- Broggehuus,
de drybsch denn nochhär d'Wänt'le-n-uus.
Au unsri Kaffimihli strahlt
denn, wenn si Aichlekaffi mahlt.

Me losst sich gärn lo ynelyme,
s'isch d'Hauptsach, ass sich d'Sprich dien ryeme.

Mit Tulpen sag' es oder Rosen,
man ahnt es, sie trägt zwei Paar Hosen.
Mir finde, s'wär jo zwor kai Schand,
me muess·nur·rede mitenand.

Es bruucht sich kaine me z'schiniere,
mit g'rymtem Misch go Stütz garniere.

Ein helles Bier, das rat' ich dir,
Ein Bier mit dir, sunsch kasch du·mir –
drum mach mal Pause, -- fass dich kurz –
s'isch all's dr glych Reglaamefurz!

Und hett ain au im Grind e Stich,
är macht sy Glotz mit däne Sprich!

Denn stets nur die Gedankenlosen,
die·schenken sich Spirituosen.
Doch dä wo dänggt, dä sait sich halt:
suffsch hundert Jahr, so wirsch au alt!

S'duet niemerts grossi Aasprich stelle,
verdiensch au mit em Saich verzelle.

Und au jedi Huusfrau weiss,
Polänte macht me nur mit Mais.
Was haltet unsre Pape fyt?
He, dreimol täglich Nitribyt!

So kunnt mit Sprich und Furzgedange
e mänge lycht zue Schwyzerfrangge.

Drum sait sich jede bleede Seggel
mit Sprich verdiensch halt, gopferdeggel!
Und isch au d'War e grosse Bruch,
blybt d'Hauptsach doch dr fuuli Spruch!
Wär so Reglaameschmonzes g'seht,
dä froggt nit lang no Qualiteet.

Scho s'füülschti Sprichli ganz ellai
bringt Pulver y em füülschte-n-Ai !!!

Am Zyschtig duet is alle g'falle
d'Usstellig* in dr Basler - Halle.

*)g'maint isch nadyrlig die beriehmte Ladärne-n-Uusstellig
Si isch offe vo de morge-n-am nynt bis z'obe-n-am elfi.
